

Kaadsid kosjad

Kui läts õks taa Kaadsid minemähe,
rikas vell' o veerümähe,
liina õks kõik müürü^q mürisivä^q,
4555 telefoni^q tirisivä^q,
liina õks jal tulba^q tudisiva^q,
aknaraami^q robisiva^q.
Kiä õks näkk', tuu kai,
heit' silme, hel'ot' sõnna:
4560 “Taa õks küll lätt kavval Kaadsid,
tukõv Toomõ pujakõnõ!”
Läts õks sis Kaadsid Taadsid poolõ,
läts Tuum Tuula poolõ.
Kaadsid ai õks sis hobõsõ morolõ,
4565 kõrvil kõlgusõ lävele.
Näio juusk' õks jo ette ime mano,
maamalõ manitsõmma:
“Jälke mullõ õks naa^q kos'a^q kodo tullil^q,
tõõsõ^q viina^q majja veere^q!”
4570 Kaadsid läts õks ka targastõ tarrõ,
kavalahõ kambrohõ:
inne õks tä koput' ussõ takah,
ummil sõrmil sõbitsõlli.
Näio õks sis ütél': “Jah, jah,
4575 tulõ^q sisse, Toomõ poig!”
Läts õks sis sisse kui siid,
kambrohõ kui kallõv,
teret' õks esse ne imme,
kulla kodorahvakõist.
4580 Kaadsid pand' õks sis viina lavva pääle,
ollõkorvi oiutõlli.
Viina õks kõik pudele^q lauliva^q,
leivä^q tandso takana^q:
“Siist veeme õks mi kodo kuku päävä,
4585 veeme muna moro pääle!”
Kulla nakse^q õks sis kosjo juumahe,
viinapikrit pill' mahe.
Kaadsid käsk' õks sis kõiki kutso^q,
lähemäidsi liigutõlla.
4590 Esi õks tä naard', esi ütél',
vikur vell' o veerätelli:
“Õga õks n'oo^q olõ-i Ale kos'a^q,
suurõ sulasõ viina^q,
õga mul õks naa^q puudu-i puidsõ^q pütü^q,
4595 tammidsõ^q takenõ-i!”
Pall' o kutsi õks sis kos'ajuujit,
armupikre pill'jit.
Kiä õks tull', tuu naard',
astõ tarrõ, ai jutto.
4600 Viina ollil^q õks jo topsil^q veeretasa,
täüs liidet lilleline.
Kiäke õks joht inne viina juu-s,
võta-s suuhtõ sukuge,
Kaadsid jei õks kui Taadsiga kokko,
4605 poolildõ poonitiva^q.

Sis ese õks jal imega jei^q,
tätä maamaga maits',
pääle jeivä^q õks jal kulla kutsut hõim,
sordido^q sugulasõ^q.
4610 Ese läts õks sis imega kõrvalõ,
taadõ-tarrõ tagasiva^q,
takah õks jal läts Taadsikõnõ,
kaldo kallis kabokõnõ.
Sääl õks nää^q märke^q uma margo,
4615 tunni aigo tuumatõlli^q.
Ese õks küll lausi meelestani,
meelest, meelee poolõstani:
“Ma taha õks küll Alelõ anda^q,
toolõ velele veerätellä!”
4620 Edimätse^q õks küll omma^q õnnõkos'a^q,
õnnõkos'a^q, hüä^q viina^q,
tõõsõ^q õks jo omma^q silmävii^q,
silmävii^q, kur'a^q kos'a^q.”
Ime õks jo käega heit',
4625 maama tougas' turilahe:
“Sa õks kui ajat latsõ jutto,
till'okõsõ tirinät -
nakat õks sa tõist ikõtamma,
mar'a muudo mut'utamma!”
4630 Innep õks mi anna rikkallõ,
üle kolga korgõllõ!”
Ime õks lausi meelestani,
meelest, meelee poolõstani:
“Inäp saadõ õks küll kidsi* rikka käest,
4635 kui lõh[n]a vaesõ käest.”
Taadsid ka õks sallõ ime jutto,
mar'a ütél' õks tä hüäst maama sõnno:
“N'oo^q joomõ õks mi kos'a^q kogonest,
joomõ viina^q viimätsest!”
4640 Ese õks sis lausi meelestani,
meelest, meelee poolõstani:
“Mine^q õks no, mine^q, mu tüteri,
kää^q, kää^q, käskjalg,
mine^q õks sa ime miilt piti,
4645 taadõ tahetot piti!
Ime õks vaest sinno tullõ toukas,
tullõ toukas, vette viskas?
Tulõst olõ-i õks imp vällä tuujat,
sau* sisest saajat.
4650 Kuulõ^q õks, mu kull'a tütrekene,
mino kallis kanakõnõ!
Tuu om õks mul hirmu hiussõh,
pelgü peenü palgõh:
Tuum nakas õks agu viina tundmahe,
4655 Kaadsid olut kaemahe?
Aleköist õks kõõ kitt' peremiis,
mino suur sugulanõ!”
Ime võtt' õks jal vasta kui västär,
ragi vasta kui raud:

4660 “Õga õks ma kullõ-i tuud jutto,
pikä vundsi petmist!
Agu Ale õks säääl tingäldä tiine,
kulla oll´ õks vaest kogone ilma?
Õga või-i õks ka usko^q umatsit,
4665 kavatsõlla^q kallist hõimo!”
Ese õks sis ütél´: “Teke^q hõste,
katõkese kaegõ^q taadõ!”
Ese kaldo õks ar vällä kambrõst,
tark miis tagatarõst,
4670 õga üttele-s õks tä süüdõ süämest,
laula-s vällä lavva takah,
pidi õks tä joonõh uma jutu,
uma^q sõna^q sõirandikuh.
Viina õks sis jeivä^q kõik üü,
4675 valgõni vallatõlli^q.
Kaadsit läts õks sis kodo minemähe,
kallis kodo kallumahe.
Sis kuts´ õks tä kodokaejit,
linnu lehmä lugõjit,
4680 kuus kuts´ õks tä kodokaejat,
mito vara-vahtjat.
Taadsit pand´ õks sis kaste kaubaräti,
vei kirsto kihlaräti -
vana oll´ õks säääl raha vaihõl,
4685 kinä kuld kespaigah.
Tälle ante ka õks ilosa^q kinda^q,
puudõh poodilangoline,
korvi õks külge köüdetivä^q,
mähe^q ollõmärsi mano.
4690 Korv õks sis juurinõ jorisi,

ollõmärsis määgäskelli:
“No lää õks ma liina lillega,
lää turgo tuttaga!”
Taadsit läts õks sis Kaadsit saatmahe,
4695 läbese lähätämmä:
ese saat´ õks ar krundi kottalõ,
kodonurmõ nulga mano.
Taadsit õks sis jätt´ tervest,
and´ käe kärmähe.
4700 Ütel´ õks sis korgõ kosilanõ,
ütél´ pikk peipoiss:
“Ar sa naaku-i õks imp Alet armatsõmma,
tõisi kosjo kullõmma,
Taadsit, heidä^q õks ar meelest nuu^q mõttõ^q,
4705 kallis Ale kaotõllõ^q!”
Sis õks ka Kaadsit kodo läts,
Taadsit tagase tull´.
Mõni käve õks sis kotoh käpikõlla,
mõni oll´ urvikõlla.
4710 Ese oll´ õks ar jäänü^q magamahe,
kallis lännõ^q kat´ mõllõ -
ese taha-s õks imp imega kõnõlda^q,
aia^q jutto armaga,
ese and´ õks ar uh´a^q näide kätte,
4715 and´ piidsa näide pejjo.
Ese näile õks küll and´ oho-uh´a^q,
kaihokabla^q kallutõlli.
Õga jovva-s imp keeldä^q esekene,
kaitsa^q vasta kasvataja,
4720 selle and´ õks ar uh´a^q umast käest,
and´ piitsa umast peost.